

Kontuola

ANTZUOLA / Egubakoitza / 2004ko otsailaren 6a / 188. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Txorikua etxea laster eraitsiko dute, Kalegoi eta Sagasti lotzeko

AINZANE IRIZAR

Aurreko egubakoitzean sinatu zituzten eskriturak Udalak eta Txorikua etxeko jabeek; oraingo astean, berriz, etxea eraisteko proiektua onartzekoak ziren. Gauzak horrela, Udalaren asmoa da lehenbailehen etxea eraitsi eta Kalegoi eta Sagasti lotzea.

Buztinzuri kalea ez dute oraindik zabalduko. Izan ere, azkenaldian egin duen eguraldi txarrak hainbat arazo sortu dizkie. Dena dela, aurrera doaz lanok eta laster zabaltzea espero dute.

Txorikua etxea, berriz, laster hasiko dira eraisten. Dokumentu guztiak sinatu dituzte dagoneko Udalak eta jabeekideek, eta etxea eraisteko proiektua ere oraingo astean onartzekoak ziren. Behin Txorikua etxea eraisten dutenean, Sagasti auzunea eta Kalegoi lotuko dituen bidea zabalduko dute. Behin-behinekoa izango da, oraingoz, bide hori, baina zirkulazioari beste irtenbide bat eman ahal izango zaio.

Talleres Antzuola zegoen erai-kina ere eraisteko asmoa zegoen. Azkenean, baina, ez dute botako; hori bai, barrutik hustu eta guz-



ARTXIBOA

Txorikua, ezkerrean, eraitsi egingo dute; Talleres Antzuola, berriz, barrutik hustu eta guztiz eraberrituko dute.

tiz eraberrituko du enpresa erakitzaile batek.

ZIRKULAZIOAN ALDAKETA UGARI

Lan horiek guztiak amaitzen dituztenean, aldaketa ugari sortuko dira zirkulazioan. Kalegoi

eta Sagasti lotuko dituen errepidea egiten dutenean, Buztinzuri kalea noranzko bakarrekoa izango da. Gainera, Udalaren asmoa da etorkizunean oinezkoendako bakarrik izatea herriko plaza eta Buztinzuri, asteburuetan. Auto-

mobilek Sagastitik ibili beharko dute. Horrela, oinezkoei eman nahi diete lehentasuna. Gainera, Buztinzuri noranzko bakarrekoa izatearekin, zirkulazio arazo garrantzitsua konponduko dute, kale hori estua da-eta.



Gimnastak bikain Arrasaten

Herriko gimnastek emaitza bikainak lortu zituzten aurreko zapatuan Arrasaten. Gipuzkoako eskola arteko txapelketa jokatu zuten hantxe. Alebinetan, Lide Toledo irabazi zuen, Usoa Toledo bigarren geratu zen eta Jurdana Pildain hirugarren. Gazte mailako A taldean, berriz, mazoekin, Uxue Arregi bigarren geratu zen eta Maialen Toledo laugarren. Eta B taldean, Maialen Legorburu bigarren tokian eta Iraitz Gastiain laugarrenean sailkatu ziren./A.I.

LABUR

Batzarra egingo du AGAk gaur, egubakoitza

Gaur, egubakoitza, 19:30ean egingo du batzar orokorra Antzuolako Gazte Asanbladak. Plazan jarri dute hitzordua. Orain dela gutxi Udako arduradunekin batzarra izan dute gazteek, eta horren berri emango dute. Baita presatu duten gaztetxearen proiektuaren berri ere.

San Blas eta Santa Ageda ospatuko dituzte asteburuan

Bihar, zapatua, San Blas jaiak ospatuko dituzte Basalde auzoan. 12:00etan, meza izango dute, eta ondoren, trikitilariak arituko dira. Etzi, domeka, berriz, Santa Ageda ospatuko dute Galartzan. 12:15ean, meza egingo dute; ondoren, salda eta txorizoa banatuko dituzte eta trikitilariak arituko dira.

Espainiari ezetz esateko, aurkezpen ekitaldia

Datorren asteko zapatuan, hilak 14, Espainiaren aldetik, era batera edo bestera, erasoak jasan behar izan dituzten hainbat herritarrek, jendaturreko agerraldia egingo dute. Hauteskudeen aurrean, Espainiari ezetz esatea proposatuko dute. Zurrategiko plazan izango da, 12:30ean.

Sinadurak batuko ditu erretiratuen elkarteak

Debagoieneko aurrez erretiratutako eta pentsionista elkartearen (APPALDE) aldearrikapenekin bat eginez, herriko erretiratuen elkarteak sinadurak batuko ditu. Bihar, zapatua, San Blas en egongo dira, goizez. Domekan, berriz, plazan eta Kalebarrenean jarriko dituzte mahaiak.

KIROLA

Udaberri saria jokatzeko dabilta Olalde elkarteko pilotariak

AINTZANE IRIZAR

Olalde elkarteko pilotariak buru-belarri sartuta daude Udaberri sarian. Eskuz binaka, nagusiak eta kadeteak dabilta; paletaz, berriz, nagusiak. Orain dela hiru aste ekin zioten txapelketa horri, eta oraingo astean herrian jokatu dituzte partiduak.

Kadete mailan, hiru pilotarik dihardute Udaberri saria jokatzeko; honako hauek, hain zuzen ere: Aitor Jauregik, Aitor Mendizabalek eta Asier Longaresek. Eskuz binaka diharduen bikotea, berriz, nagusien mailakoa, honako hauek osatzen dute: Josu

Agirrek eta Xabier Biterik. Azkenik, larruzko paletaz, nagusien mailako beste bikote bat ere bada bil txapelketa hori jokatzeko: Iker Manso eta Gotzon Zabalo, hain zuzen ere.

Aurreko asteburuan, hiru bikoteek irabazi egin zuten: kadeteek 1-22 irabazi zioten Urnieta-ri; Agirrek eta Biterik, berriz, 20-22 irabazi zioten Altxatarrak taldeko bikoteari. Paletaz, azkenik, Mansok eta Zabalok ere irabazi egin zuten, 28-35, Zumaia-koren aurka.

Infantilek, berriz, Neguko Saria jokatzeko dihardute, Eskoriatzan. Aurreko asteburuan, 18-4 galdu zuten Anaitasunaren aurka.

ZAPATUAN, PARTIDU MORDOA

Bihar, zapatua, 15:30etik aurrera, Debagoienean eskola kirolean dabilta neska-mutikoen partiduak jokatzeko dira. Benjamin mailako hiru partidu eta alebin mailako beste hiru jokatzeko dituzte. Ondoren, 18:00etatik aurrera, Udaberri Sariko partiduak jokatzeko dituzte.

BERRAONDO, BINAKAKO TXAPELKETA

Aritz Berraondok, berriz, bigarren mailako eskuz binakako txapelketa jokatzeko dihardute, Eulate bikotekide duela. Aurreko egubakoitzean, hilak 30, jokatu zuten lehendabiziko partidua eta 22-8 irabazi zioten Galartza V.a eta Zubietari.

ERREPIDEAK

Bergararako kaminoa zuloz beteta dago

AINTZANE IRIZAR

Orain dela aste batzuetatik hona, Bergara eta Antzuola arteko errepidea izugarri hondatu da. Zulo mordoak dago lurzoruan, eta herritar ugariaren keak jaso ditugu. Bestalde, Bonbulutik aurrera, errepideak itxita jarraitzen du, eta hilabete batzuk jarraituko du hala.

Aspaldian, nahiko arazo sortu dira Antzuola inguruko errepideetan. Batetik, Bonbuluko errepidea itxita dago, azaroa ezker. Gainera, orain dela aste batzuk Joxe Joan Gonzalez de Txabarri diputatu nagusiak Antzuolan bertan esan zuenez, hilabete batzue-

tan jarraituko du itxita errepide horrek.

Gauzak horrela, Antzuolatik Bergarara joateko, lau kilometro gehiago egin behar dira. Gainera, keak azaldu dituzten herritarren esanetan, hilabete batzuk lehenago ere denbora luzez egon zen itxita.

ORAIN, LURZORUA HONDATUTA

Orain, berriz, Bergara eta Antzuola arteko errepidea zuloz beteta dago. Duela aste batzuetatik hona, izugarri hondatu da lurzorua, eta han eta hemen aurkitzen ditugu zuloak. Herritar ugariaren keak jaso ditugu, errepidearen egoera eskasatik eta Bonbuluko errepidea itxita dagoelako.



Izperra saria eman dio Goizperrek Mari Beni Larreari

Goizper enpresako Euskara Koordinazio batzordeak Izperra saria eman dio Mari Beni Larreari; 30 urte daramatza Goizperren lanean eta urte horietan guztietan euskararen alde egindako lana eskertzeko eman diote saria. Haritz landare bat eman zioten, eta baita bertso bat kantatu ere. Amaia Etxaniz euskara teknikariak ere jaso zuen sari hori. Aurreko egubakoitzean Adunako sagardotegi baten egindako afarian eman zioten saria. Argazkian, Mari Beni saria jasotzen./A.I.

LABUR

KZgunearen ordutegia aldatu dute berriro eta egubakoitz arratsaldetan irekiko dute

Orain dela aste batzuk jakinarazi genizuen moduan, hemendik aurrera egubakoitzetan bakarrik zabalduko dute KZgunea. Hasiera baten, goizez bakarrik zabalduko erabaki zuten, baina, azkenean, arratsalde zabalduko dute, 16:00etatik 18:00etara, hain justu.

Familia erantzukizunaren gaineko programa baten dihardute hainbat gurasok

Euskal Herriko Unibertsitateak antolatuta, orain dela pare bat astetik, familiako erantzukizunaren gaineko programa baten parte hartzen dihardute hainbat gurasok. Martitzenero elkartzen dira Herri Ikastetxeko umeen hamabost bat guraso.

KIROLA

PARTIDUAK

FUTBOLA

Otsailak 7
16:00: Antzuola-La Salle (Gazteak)

PILOTA

Otsailak 7 (Udaberri Saria)
18:00: Olalde-Elordi Herrig. (kad.)
Ondoren: Olalde-Eibar (eskuz nag.)
Ondoren: Olalde-Andazpe (pal. nag.)

EMAITZAK

FUTBOLA

Union Txiki 1 Antzuola 1 (2. erreg.)
Antzuola 1 Axular 2 (Gazteak)
Antzuola 1 Soraluze 0 (Kadeteak)
Zarautz 6 Antzuola 3 (Neskek)

PILOTA

Udaberri Saria
Urnieta-Olalde (eskuz kad.) 1-22
Altxatarrak-Olalde (eskuz nag.) 20-22
Zumaia-Olalde (palet. nag.) 28-35

LARREA
TABERNA
Kalebarren 17
ANTZUOLA

ANTZUOLA
Apainketak eta isolamenduak
Pladurrezko dibisioak
Kalegoi 21 ANTZUOLA
676 997 400
Billegia: 943 78 70 40

Tomas Gezalaga
Apainketarako eta industriarako pinturak
Paper margotuak
Moketak eta tapizatuak
Kalegoi 21
Tel.: eta faxa 943 76 64 07
Poltsikokoa 616 277 999
ANTZUOLA / BERGARA

GAILUR
taberna eta gozotegia
Buztinuzuri 13 ANTZUOLA
Tel.: 943 78 70 32

Tomas Gezalaga
Zoruen kutxilatua eta bernizatzea
Kalegoi 21
Tel.: eta faxa 943 76 64 07
Poltsikokoa 616 277 999
ANTZUOLA / BERGARA